

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 22. Juli 2022

Här President,

esou wéi d'Chamberreglement et virgesäit, bieden ech lech, dës parlamentaresch Fro un den Här Policeminister an un d'Madamm Justizminister weiderzeleeden.


D'Kriminalitéit huet an deene leschten 20 Joer zu Lëtzebuerg staark zougeholl. Bei der Unzuel vun Iwwerfäll läit Lëtzebuerg vir bäi am Spëtzepëloton vun alle Länner an Europa. Allerdéngs gëtt nëmme wéineg vun den Autoritéiten no bausse kommunizéiert, an d'Transparenz gëtt verhënnert. Sou gouf beispillsweis op meng parl. Fro Nr. 5457, déi sech mat dësem Sujet beschäftegt hat, geäntwert: *"D'Police féiert keng Statistiken iwwert d'Zuel vu Faiten, déi kommunizéiert, resp. net kommunizéiert ginn. Déi absolut Zuelen zu den Strofdote ginn integral an der järelecher Kriminalitéitsstatistik vun der Police verëffentlecht."*

Mat de rezenten Atrocitéiten am Zesammenhank mat der Täterband, déi sech selwer "17" bzw. "1Block7" bzw. "17 Antisistema" nennt, gouf een neien trauregen Déifpunkt an dëser Entwécklung erreicht. Och wat de Manktem un Transparenz säitens den Autoritéiten ugeet. Sou heescht et am Artikel "Die Omertà der Opfer" (LW vum 22.7.2022): *"Konkrete Zahlen zu festgestellten Taten will aus ermittlungstechnischen Gründen auch hinter vorgehaltener Hand niemand nennen."*

An deem Kontext hunn ech folgend Froen un den Här Minister an un d'Madamm Minster:

- 1) Kann d'Regierung am Zesammenhank mat der genannter "Happy Slapping"-Tätergrupp konkret Zuelen nennen, wat d'Affer an d'Täter ugeet? Vu wéi enger Donkelziffer geet d'Regierung aus?
- 2) Si schonns verschidden Täter vun deene genannte Gruppen identifizéiert? Wa jo, wéi vill? Wat weess een iwwer dës Persounen (Alter, Geschlecht, Nationalitéit, asw.)?
- 3) Ass scho gewosst, wat mat dësen Täter geschéie wäert bzw. wou se hikommen? Wann net, feelt et den zoustännegen Instanzen u Kapazitéite bzw. un deenen néidegen Infrastrukturen, fir dës Täter onschiedlech ze maachen?
- 4) Gëtt et säitens der Regierung ee konkrete Plang, wéi d'Gesellschaft, a besonnesch eis Kanner, virun esou Verbriecher geschützt solle ginn?

Mat déiwem Respekt,

A handwritten signature in black ink, appearing to be 'Fred Keup', written in a cursive style.

Fred Keup,  
Deputéierten